

दिनांक :16.05.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- जनगणना 2027 रा तैत राज्य मांय आज मकानां री लिस्ट बणावण रो काम सरू व्ह्यो
- नीट-यूजी 2026 पेपर लीक मामला मांय सी.बी.आई. आज एक और आरोपित ने पकड़यो-हाल ताई 9 जणा गिरफ्तार करी ज्यां
- राज्य मांय व्यावसायिक शिक्षा ने बधावो देवण सारू 500 स्कूलां मांय नुवा कोर्स सरू कर्या जावेलं
- प्रदेश रा घणखर हलकां मांय जबरदस्त गर्मी -आवता सप्ताह मांय पारो 2 ऊं 3 डिग्री सेल्सियस ताई और चढबा रा आसारं

000

जनगणना-2027 रा तैत प्रदेश मांय आज मकानां री लिस्ट बणावण रो काम सरू व्हे ग्यो 14 जून ताई चालण वाळा ई काम मांय प्रगणक घर-घर जा र मकान बणावण मांय काम लीरीजी सामग्री अर मौजूद सुबीतां रा बारा मांय 33 सवाल पूछ रह्या हैं भीलवाड़ा जिला मांय ई काम सारू 4 हजार 163 प्रगणक लगायी ज्या हैं जिला कलेक्टर जसमीत सिंह संधू जनता ऊं प्रगणकां ने सही जाणकारी दे र प्रशासन री मदद करण री अरज कीनी हैं पाली जिला मांय ई 3 हजार ऊं बत्ता प्रगणक मोबाइल ऐप रे जरिए वास्तविक लोकेशन सागे जाणकारियां भेळी कर रह्या हैं

000

नीट-यूजी 2026 परीक्षा रा पेपर लीक मामला मांय सीबीआई आज एक और आरोपित महाराष्ट्र रा पुणे री बोटनी री शिक्षिका मनीषा गुरुनाथ मंधारे ने गिरफ्तार लीनीं वां ने राष्ट्रीय परीक्षण एजेंसी विशेषज्ञ रा तौर ऊं नियुक्त कीनी हीं जांच एजेंसी रे मुजब वां री जूलॉजी अर बोटनी रा पेपर ताई पूरी पहुंच हीं सीबीआई रे मुजब वा 14 मई ने पकड़ी ज्या आरोपित मनीषा वागमारे रे मार्फत नीट परीक्षा रा उम्मीदवारां ने वां रा पुणे रा घर मांय खास कोचिंग कक्षा लगायीं ई मामला मांय हाल ताई दिल्ली, जयपुर, गुरुग्राम, नासिक, पुणे अर अहिल्यानगर ऊं 9 आरोपितां ने पकड़ी ज्या हैं आं मांय ऊं जणां ने अदालत मांय पेश कर र पूछताछ सारू सात दिन री रिमांड माथे ले लिया ज्या हैं काल गिरफ्तार करी ज्या दो आरोपितां ने पुणे री अदालत सामी पेश करी ज्या, जठे ऊं वां ने अदालत दिल्ली भेज दीनां लारला 24 घंटां मांय सीबीआई न्यारी-न्यारी ठौड़ां ऊं केई आपत्तिजोग कागजात, लैपटॉप, बैंक स्टेटमेंट अर मोबाइल फोन जब्त कीना हैं

000

केंद्रीय संस्कृति अर पर्यटन मंत्री गजेंद्र सिंह शेखावत कह्यो है के ए.आई. रा दौर मांय देश री हिफाजत रा हलका मांय खुद रे पाण ऊबो व्हेवणो ई देश री सम्प्रभुता री गारंटी हैं वे आज जोधपुर मांय रक्षा प्रयोगशाला रा 68वां स्थापना दिवस रे मौके राख्यी ज्या जळसा मांय बोल रह्या हां केंद्रीय मंत्री कह्यो के दुनिया रा बदलता हालात मांय अब केवल पारंपरिक हथियार ही युद्ध रो जरियो नी है, बल्कि पेमेंट गेटवे अर सेमीकंडक्टर चिप बणावण सरीखी तकनीकां ई लड़ाई रा हथियार बण ग्यी हैं वे कह्यो के देश हिफाजत रा हलका मांय काम आवण वाळा साज-ओ-सामान दिसावर ऊं मंगावण री बजाय देश मांय ई बणा र खुद रे पाण ऊबो व्हेवण ओडी तेजी ऊं बढ रह्यो हैं

000

राजस्थान विधानसभा बण्या 75 साल व्हेवण रे मौके 18 मई ने विधानसभा रा नुवा लोगो रो विमोचन अर ऐतिहासिक दरुजां रो नामकरण कर्यो जावेलां विधानसभा अध्यक्ष वासुदेव देवनानी बतायो के लारला अढाई बरस मांय राजस्थान विधानसभा मांय डिजिटल अर पेपरलेस व्यवस्था, डिजिटल संग्रहालय, संविधान दीर्घा अर जनदर्शन सरीखा केई खास नवाचार करी ज्या है, ज्यां ऊं इण री देश मांय खास ओळखाण बणी हैं ई खास कार्यक्रम मांय राज्यपाल हरिभाऊ बागडे, मुख्यमंत्री भजनलाल शर्मा, विपख रा नेता टीकाराम जूली अर संसदीय कार्य मंत्री जोगाराम पटेल समेत केई मान्योडा लोग शामिल व्हेलां

000

मुख्य सचिव वी. श्रीनिवास आज जयपुर रा भामाशाह टेक्नो हब रो दौरा कर र स्टार्टअप्स अर नौजवान कारोबारियां कानी ऊं कर्या जा रह्या तकनीकी नवाचारां री जाणकारी लीनीं वे रक्षा, शिक्षा अर स्वास्थ्य अर पोषण सरीखा खास हलकां मांय स्टार्टअप्स री कोशियां देखी अर वां री सराहवणा कीनीं मुख्य सचिव ए.आई. अर नुवी तकनीक माथे आधारित भणार्ई—लिखाई ऊं जुड्या स्टार्टअप्स ने पीएमश्री स्कूलां ऊं जोडबा माथे जोर दीनीं

000

प्रधानमंत्री नरेन्द्र मोदी कह्यो है के भारत अर नीदरलैंड दुनिया रा संकटां रो सामो करण सारू भरोसेमंद, साफ अर आवता बगत सारू तैयार आपूर्ति व्यवस्था बणावण रा बारा मांय मिल र काम कर रह्या हैं वे पांच देशां रा दौरा रा तैत आज नीदरलैंड रा हेग मांय भारतीय समुदाय रा लोगां ने सम्बोधित कर रह्या हां श्री मोदी ऊर्जा संकट सरीखी चुनौतियां रो निपटारो बेगो नी व्हेवण री सूरत मांय दुनिया रा विकास माथे असर पडबा सागो मोटी आबादी रे गरीबी री ओर बढबा री शंका जतार्यीं प्रधानमंत्री कह्यो के 21वीं सदी मांय भारत मौकां री धरती बण र सामी आयो है, जो तकनीक अर इंसानी मूल्यां रा आधार ऊं आगे बढ रह्यो हैं

000

प्रदेश मांय राष्ट्रीय शिक्षा नीति-2020 रे मुजब व्यावसायिक शिक्षा ने बधावो देवण सारू पांच सौ स्कूलां मांय नुवा कोर्स सुरू कर्या जावेलां संसदीय कार्य मंत्री जोगाराम पटेल आज जोधपुर जिला रा मणार्ई मांय एक स्कूल मांय राख्यी ज्या कार्यक्रम मांय आ जाणकारी दीनीं वे कह्यो के ई काम माथे 51 करोड रुप्या ऊं बत्ती रकम खर्च करी जावेलां मंत्री बतायो के बजट मांय करी ज्या ऐलाण रे मुजब स्कूलां मांय बुनियादी ढांचा रा विकास सारू दो हजार करोड रुप्या रो विद्यालय आधारभूत संरचना कोष बणायो जावेलां श्री पटेल बतायो के करीब 400 स्कूलां ने 'सीएम-राइज' स्कूलां रा तौर ऊं विकसित करी जावेला अर एक हजार स्कूलां मांय एआई आधारित लर्निंग लैब्स खोली जावेलां

000

सैलाणियां री हिफाजत अर सुबीता सारू जयपुर पुलिस ए-आई आधारित भीड सुरक्षा प्रणाली अर पिंक गार्ड मोबाइल ऐप सरीखा नवाचार कीना हैं पिंक गार्ड मोबाइल ऐप री जाणकारी देता थकां जयपुर रा पुलिस कमिश्नर सचिन मित्तल कह्यो के न्यारी-न्यारी भाषावां मांय काम करण वाळो ओ ऐप स्मार्ट नेविगेशन अर तुरत मदद सरीखा सुबीता ई मुहैया करावेलां वे कह्यो के ई ऐप रे मार्फत सैलाणियां ने सुरक्षित गेलां री जाणकारी, सत्यापित गाइडां री लिस्ट अर मुश्किल बगत मांय मदद मिल सकेलां

000

जयपुर रा जवाहर कला केंद्र मांय आज जूनियर समर कैंप सुरू व्ह्यो पर्यटन, कला अर संस्कृति विभाग री शासन सचिव शुचि त्यागी इण रो उद्घाटन कीनीं 20 जून तांई चालण वाळा ई कैंप मांय मोटी तादाद मांय बच्चा नाम मड़ाया हैं जवाहर कला केंद्र री अतिरिक्त महानिदेशक डॉ. अनुराधा गोगिया

बतायो के शिविर मांय बच्चां ने रंगमंच सागे कला समेत न्यारी-न्यारी विधावां री व्यावहारिक सिखावण दी जा रही हैं

.....

000

प्रदेश रा घणखर हलकां मांय जोरदार गर्मी पड़ रही हैं मौसम विभाग रे मजब लारला चौबीस घंटा मांय फलौदी 44 दशमलव 8 डिग्री सेल्सियस अधिकतम तापमान सागे सब ऊं उन्नी ठौड़ रह्यो महकमा रे मुजब आवता सप्ताह प्रदेश रा घणखर हलकां मांय पारो दो ऊ 3 डिग्री सेल्सियस तांई और चढ़बा रा आसार हैं ई दौरान ऊगणी अर आतूणी हलकां मांय तापमान 45 डिग्री सेल्सियस तांई पूगण री संभावना हैं ई बीचे 18 मई ऊं आतूणी अर उतराद हलकां मांय जोरदार बायरो बाजण री संभावना हैं

000

राष्ट्रीय डेंगू दिवस रे मौके प्रदेश मांय ई केई कार्यक्रम राख्यी ज्यां झुन्झुनू मांय एएनएम ट्रेनिंग सेन्टर री टाबरियां री ओर ऊं जागरूकता रैली निकाळ र डेंगू ऊं बचाव अर मच्छरां री रोकथाम रा बारा मांय जाणकारी दीरीजीं जैसलमेर मांय चिकित्सा अर स्वास्थ्य विभाग रा कर्मचारियां री ओर ऊं मच्छर मारण सारू जतन करी ज्या अर जनता ने जाणकारी दीरीजीं करौली मांय **जांच करें, सफाई करें और ढकें** मुद्दा माथे चलाया जा रह्या अभियान रा तैत शहरी अर गांवाई हलकां मांय डेमो, पोस्टर, पम्पलेट अर सोशल मीडिया रे ज़रिये जाग जगायी जा रही हैं